



Daniel Vila recibindo de mans do reitor a contía recadada.

O CONCERTO SOLIDARIO DE JUANCHO MARQUÉS RECADOU 1800 EUROS PARA ENXEÑERÍA SEN FRONTEIRAS

M. DEL RÍO DUVI 04/11/2019

O pasado 17 de outubro o Teatro Vidal Bolaño de Cidade Universitaria ategíbase de mozos e mozas no concerto do rapeiro Juancho Marqués. Pero o éxito desta cita non foi só de público, xa que con esta actuación solidaria recadáronse 1800 euros para a ONG Enxeñeiros sen Fronteiras. Este luns, o reitor, Manuel Reigosa, fíxolle entrega da contía obtida a Daniel Vila, representante da asociación, unha achega solidaria que se destinará tanto a proxectos en Galicia como a outros que están a desenvolver en Honduras. [+info.](#)



Sete mozos a mozas participan no obradoiro que impartíe Marlene Armentero.

USUARIAS E USUARIOS DE DOWN XUNTOS AMPLÍAN NO CAMPUS A SÚA FORMACIÓN MUSICAL

EDUARDO MUÑIZ DUVI PONTEVEDRA 11/11/2019

O pasado curso, a Vicerreitoría do campus e [Down Pontevedra Xuntos](#) promoveron por primeira vez un taller de educación musical dirixido a usuarios e usuarias da etapa educativa desta asociación. Os positivos resultados deste primeiro obradoiro, impartido pola profesora de música Marlene Armentero, motivaron a repetición desta iniciativa no presente curso, no que sete usuarios e usuarias de Down Xuntos, que xa participaran na primeira edición, ampliarán a súa formación ao longo dos próximos meses, nunha actividade na que traballarán tanto a entoación e vocalización como os ritmos corporais, á vez que a propia linguaxe musical. [+info.](#)



O obradoiro "Comunícate coas mans" desenvolveuse na Facultade de Ciencias Sociais e da Comunicación.

UN OBRADOIRO NO QUE APRENDER A "COMUNICARSE COAS MANS"

EDUARDO MUÑIZ DUVI PONTEVEDRA 04/11/2019

Estudantes das facultades de Ciencias da Educación e do Deporte e Ciencias Sociais e da Comunicación e profesionais de diferentes ámbitos iníciáanse nestes meses no campus na lingua de signos, no marco de *Comunícate coas mans*, un obradoiro inserido no programa de actividades de Extensión Universitaria promovido pola Vicerreitoría do campus para este primeiro cuadrimestre. [+info.](#)



O presidente de Down Vigo e o reitor, no centro, acompañados pola vicerreitoría de Estudantes e un técnico da Asociación.

INTEGRANTES DE DOWN VIGO REALIZARÁN PRÁCTICAS PROFESIONAIS NA UNIVERSIDADE

D. BESADÍO DUVI 04/11/2019

As e os integrantes de Down Vigo poderán realizar prácticas profesionais na Universidade de Vigo grazas ao convenio asinado este luns entre o reitor, Manuel Reigosa, e o presidente da asociación, José Manuel García Orois. Ambos amosaron a súa satisfacción por acadar un acordo que lle permitirá aos beneficiarios deste programa de prácticas gañar experiencia no ámbito administrativo e noutros sectores vinculados aos servizos da UVigo. [+info.](#)



Yanina Alfaya e Sara Piñeiro, cos materiais de Youth can act!

UNHA “LIBRARÍA HUMANA” PARA PROMOVER O ACTIVISMO ENTRE A MOCIDADE

DUVI PONTEVEDRA 05/11/2019

Dar a coñecer o labor que a xente nova realiza en ámbitos como o feminismo, o ecoloxismo ou a defensa dos dereitos do colectivo LGTBI a través dunha “librería humana”, na que dez mozos e mozas relatan as súas experiencias neste eido, constitúe o eixo de *Youth can act!*, unha campaña dirixida a promover o activismo entre a mocidade. [+info.](#)



Imaxe da última edición da feira.

A III FEIRA DE EMPREGO XURÍDICO DE GALICIA E NORTE DE PORTUGAL CELEBRARASE O 19 DE NOVIEMBRE

DUVI OURENSE 06/11/2019

A III Feira de Emprego Xurídico de Galicia e Norte de Portugal Orienta luris, organizada pola Facultade de Dereito do campus de Ourense, xa ten data de celebración. Será o día 19 de novembro nas instalacións do centro, no edificio Xurídico-Empresarial. A iniciativa afronta unha nova edición renovando o seu compromiso de fomentar a empregabilidade do alumnado e a realización de prácticas preprofesionais. [+info.](#)



Participantes na primeira edición do Emlex Wiktionary Hackfest.

O CAMPUS ACOLLE DE NOVO O ÚNICO MARATÓN DIRIXIDO A INCORPORAR CONTIDOS AO 'GALIZIONARIO'

EDUARDO MUÑOZ DUVI PONTEVEDRA 06/11/2019

Inserido nas actividades do mestrado europeo en lexicografía Emlex, a Facultade de Ciencias da Educación e do Deporte acolleu o pasado ano por primeira vez o [Emlex Wiktionary Hackfest](#), un maratón dirixido a sumar novos contidos ao *Galizionario*, a versión galega do *Wiktionary*. A boa acollida que recibiu este "hackatón" motiva que o vindeiro xoves 14 de novembro este centro do campus pontevedrés sexa de novo sede do único maratón dedicado á versión en galego deste dicionario colaborativo multilingüe. [+info.](#)



O posto está ubicado na entrada do centro.

AS HORAS NA BIBLIOTECA TRANSFÓRMANSE EN DIÑEIRO PARA CAUSAS SOLIDARIAS

DUVI OURENSE 07/11/2019

Desde o pasado 5 de novembro e ata o 5 de decembro, as horas na Biblioteca Rosalía de Castro volven a transformarse en diñeiro para causas solidarias. O campus participa un ano máis na [Olimpíada Solidaria de Estudo](#), iniciativa internacional organizada por ONGD Coopera, Cooperación Internacional e ACTEC. A recadación conseguida neste centro destinarase a dous proxectos para o empoderamento de mulleres de Ecuador e República Democrática do Congo. [+info.](#)



Participantes na conferencia.

O CONTROL DE XESTIÓN, VISTO DESDE UNHA PERSPECTIVA DE XÉNERO

DUVI OURENSE 07/11/2019

A Facultade de Ciencias Empresariais e Turismo do campus acolleu este mércores a celebración da conferencia *Control de xestión dende unha perspectiva de xénero*, coordinada polo profesor Ernesto López-Valeiras e financiada pola Unidade de Igualdade da Universidade de Vigo e Ecobas. O obxectivo da iniciativa foi, segundo o seu responsable, contribuír a que o alumnado teña unha visión máis completa desta función directiva e reflexionar sobre o feito de que “tres de cada catro postos de control de xestión están ocupados por homes”. [+info.](#)



A UNIVERSIDADE DÁSE A COÑECER ENTRE MÁIS DE 300 ESTUDANTES DO SALNÉS NAS XORNADAS COMARCAIS DE ORIENTACIÓN

DUVI 08/11/2019

A idea é achegarse ao futuro alumnado universitario e tamén aos seus profesores e orientadores, ofrecerlles a información precisa sobre o proceso de acceso á Universidade e amosarlles toda a oferta académica e complementaria que ofrece a Universidade de Vigo. Con estes obxectivos a Vicerreitoría de Captación de Alumnado, Estudiantes e Extensión Universitaria puxo en marcha as Xornadas comarcais de orientación, nas que tanto persoal técnico como docentes se achegan a diferentes vilas de toda Galicia dando a coñecer os tres campus da institución académica. [+info](#).



IGUALDADE RETA AOS ALUMNOS, PAS E PROFESORES A CONSTRUIR NOVOS MODELOS DE MASCULINIDADES

DUVI 08/11/2019

Alumnos, profesores e traballadores de administración e servizos dos tres campus. Eles son os protagonistas da nova acción posta en marcha pola Unidade de Igualdade dentro da campaña *A igualdade está de festa*, paraugas baixo o que este curso se abrigan as diferentes iniciativas postas en marcha dende a Universidade para axudar a construír un mundo libre de violencias machistas. Entre estas temáticas atópase a prevención das masculinidades tóxicas, que é o eixe central no que se vertebra esta nova acción que se lanza ás redes sociais a poucos días de celebrarse o 25N, Día Internacional contra a Violencia de Xénero. [+info](#).



O PROGRAMA CORRESPONDENTES UNIVERSITARIOS ABRE O PRAZO DE INSCRICIÓN

Ser un nexa entre a Dirección Xeral de Xuventude, Participación e Voluntariado e o alumnado das universidades. Con este obxectivo en 2016 a Xunta de Galicia e a Universidade de Vigo puxeron en marcha o programa Correspondentes Universitarios, unha rede de estudantes voluntarios que traballan na difusión e dinamización da información xuvenil entre as e os seus compañeiros de estudos. [+info](#).



Nesta convocatoria financiaranse cinco iniciativas das 14 presentadas.

VIGO SÍTÚASE Á CABEZA DAS UNIVERSIDADES GALEGAS EN PROXECTOS DE INVESTIGACIÓN EN COOPERACIÓN PARA O DESENVOLVEMENTO

Ma DEL CAMEN ECHEVARRÍA DUVI 11/11/2019

Mediación lingüística para a cooperación ao desenvolvemento. Formación do profesorado que desenvolve o seu traballo no programa de educación bilingüe en Mozambique e cooperación para o desenvolvemento litoral sostible. Estas son as temáticas dos tres proxectos de investigación en materia de cooperación ao desenvolvemento da Universidade de Vigo que a Xunta de Galicia subvencionará na convocatoria aberta para este ano, que ten a finalidade de crear grupos de investigación que centren a súa actividade en cooperación para o desenvolvemento. [+info.](#)



Actividade desenvolvida en atlanTTIC na primeira edición do programa..

MÁIS DUNHA TRINTENA DE ACTIVIDADES PARA AMOSAR Á SOCIEDADE O TRABALLO DOS CENTROS SINGULARES DE INVESTIGACIÓN DA UNIVERSIDADE

DUVI 12/11/2019

Os centros singulares de investigación da Universidade de Vigo abrirán de novo as súas portas á cidadanía a partir do vindeiro venres 15 de novembro. Ao abeiro da segunda edición do programa *Divulgando Ciencia Singular*, o Centro de Investigación en Tecnoloxías de Telecomunicación (atlanTTic), o Centro de Investigación Mariña (CIM), o Centro de Investigacións Biomédicas (Cinbio) e o Centro de Investigación en Tecnoloxías, Enerxías e Procesos Industriais (Cintecx) desenvolverán ao longo dos meses de novembro e decembro un programa de actividades que permitirá “coñecer de primeira man o traballo que se fai nestes centros. [+info.](#)



María Teresa Cores, Natalia Caparrini e José Luís González.

A SEMANA DE CINE SUBMARINO ACADA A SÚA 29ª EDICIÓN CONTRAPOÑENDO A BELEZA ÁS AMEAZAS QUE SOFREN OS OCÉANOS

DUVI 13/11/2019

“O fío condutor desta Semana de Cine Submarino é o reflexo do que hoxe en día clama a sociedade por resolver: a contaminación por vertidos e plásticos, a sobrepesca ou o desxeo dos polos, e como contrapartida a beleza dos comportamentos dos animais nos diferentes mares e océanos do mundo ou a conservación dos derradeiros redutos salvaxes”. [+info.](#)



Imaxe da última Gala do Deporte Universitario celebrada no campus de Ourense.

A XXVIII GALA DO DEPORTE UNIVERSITARIO ENTREGARÁ 31 PREMIOS INDIVIDUAIS E DEZ COLECTIVOS

DUVI OURENSE 13/11/2019

A XXVIII Gala do Deporte Universitario xa ten palmarés de galardoadas e galardoados. Nesta edición, correspondente ao curso 2018/19, a Universidade de Vigo entregará 31 premios individuais e dez colectivos nunha cita que pretende distinguir o compromiso coa práctica deportiva e cos seus valores principalmente da comunidade universitaria pero tamén de persoas e entidades alleas a ela. [+info.](#)



A vicerreitora de Comunicación; o vicerreitor de Planificación; o reitor; a directora da Unidade de Igualdade xunto a unha usuaria da sala de lactación de Filomena Dato

VIGO É DESDE HOXE A PRIMEIRA UNIVERSIDADE GALEGA E A CUARTA ESPAÑOLA EN DISPOR DE SALAS DE LACTACIÓN NOS SEUS TRES CAMPUS

DUVI 14/11/2019

Catro salas de lactación, dúas no campus de Vigo e outras tantas no de Pontevedra, pon en servizo a partir de hoxe a Universidade de Vigo, que ademais en vindeiros días sumará unha quinta no campus ourensán. Con estas cinco salas nos seus tres campus, destinadas a favorecer que as súas traballadoras e estudantes poidan continuar coa lactación materna cando se incorporen ao seu posto, tralo nacemento das súas fillas e fillos, a Universidade de Vigo convértese na primeira de Galicia e na cuarta de España. [+info.](#)



A estudante da EE Forestal Nerea Mallo.

UNHA PUBLICACIÓN BUSCA DAR VOZ ÁS MULLERES DO MUNDO FORESTAL GALEGO

EDUARDO MUÑOZ DUVI PONTEVEDRA 15/11/2019

Como unha “revista de rescate histórico” presenta a estudante da Escola de Enxeñaría Forestal Nerea Mallo *A muller no mundo forestal galego*, unha publicación na que reuniu os testemuños de trece “mulleres forestais galegas”, co propósito de que “moitas historias non queden sen contar”. A publicación, que conta co patrocinio da Unidade de Igualdade da Universidade de Vigo, reúne as opinións de enxeñeiras forestais e de montes, empresarias, bombeiras forestais, axentes medioambientais ou investigadoras. Boa parte das protagonistas desta publicación participarán, de feito, no coloquio de presentación da revista que terá lugar este venres ás oito da tarde na sede da Vicerreitoría do campus. [+info.](#)



Raquel Fernández, Sandra Maceira, Jéssica Cáliz e Candelaria Alasino.

ALUMNAS DE EDUCACIÓN SOCIAL REALIZAN UNHA CAMPAÑA DE SENSIBILIZACIÓN CONTRA A VIOLENCIA DE XÉNERO

ROSA TEDÍN DUVI OURENSE 18/11/2019

Co gallo da conmemoración o 25 de novembro do Día Internacional contra a Violencia de Xénero, catro alumnas do Grao en Educación Social, da Facultade de Ciencias da Educación do campus de Ourense, puxeron en marcha este luns unha campaña de sensibilización contra os feminicidios. A través de dous murais situados na entrada do Edificio de Ferro, o seu obxectivo é contribuír “á visibilización deste problemática na sociedade”. [+info.](#)



Os produtos foron validados en diferentes campañas na ría de Vigo. Foto: Mariana Mata Lara.

O PROXECTO EUROPEO COASTOBS DEMOSTRA O POTENCIAL DOS SATÉLITES PARA A MONITORAXE DE AMBIENTES COSTEIRO

D. BESADÍO DUVI 19/11/2019

Os resultados preliminares do proxecto europeo da convocatoria H2020 [CoastObs](#) demostraron o potencial dos satélites Sentinel na predición das floracións de algas nocivas (FAN), comunmente coñecidas como mareas vermellas, un fenómeno frecuente nas Rías Baixas galegas, onde causan un forte impacto, non só ecolóxico senón tamén económico, obrigando en determinadas ocasións ao peche temporal dos polígonos de bateas. Dirixido polo profesor do Departamento de Física Aplicada Jesús M. Torres Palenzuela, o proxecto presenta agora novos avances. [+info.](#)



Vigo é unha das universidades participantes no proxecto Liquencity2. Foto: Real Jardín Botánico (RJB-CSIC).

UN PROXECTO DE CIENCIA CIDADÁ AVALIARÁ A CALIDADE DO AIRE EN PONTEVEDRA A TRAVÉS DOS LIQUES

DUVI PONTEVEDRA 20/11/2019

Os liques son excelentes indicadores da contaminación do aire e foron utilizados polos científicos para observar os niveis de contaminación en numerosas cidades de todo o mundo. Así o revelou tamén a primeira fase do proxecto [Liquencity](#), que permitiu, mediante a colaboración de máis de 2000 cidadás, a maior parte estudantes de secundaria, estudar os niveis de contaminación en Madrid e Barcelona. [+info.](#)



A investigadora Elena Ojea en Roma cun dos coordinadores do informe, Christopher Costello.

ELENA OJEA, ÚNICA CIENTÍFICA ESPAÑOLA QUE PARTICIPA NO INFORME SOBRE ALIMENTACIÓN SOSTIBLE NOS OCÉANOS PARA O HIGH LEVEL PANEL FOR A SUSTAINABLE OCEAN ECONOMY

M^a DEL CAMEN ECHEVARRÍA DUVI 20/11/2019

O océano ten o potencial de cubrir con creces a demanda alimentaria futura, tendo en conta o incremento da poboación mundial, non obstante, este potencial non se cubre só coa pesca, senón que se require desenvolver a acuicultura mariña para cubrir esta demanda, unhas cifras que se obteñen de calcular os beneficios de xestionar os stocks comerciais de xeito sostible e de desenvolver acuicultura mariña en zonas bioloxicamente axeitadas para as especies que se cultivan na actualidade. [+info.](#)



Isabel Gómez, Adriana Diéguez, Noemí Iglesias, Esther de Blas e Cecilio Santalices..

A CAMPAÑA SOLIDARIA DO NADAL BUSCA DOAZÓNS DE ALIMENTOS, XOGUETES E LIBROS

ROSA TEDÍN DUVI OURENSE 20/11/2019

Un ano máis o campus de Ourense únese á recollida solidaria de alimentos, xoguetes e libros para axudar ás familias máis necesitadas a ter un mellor Nadal. Os carriños solidarios estarán situados na entrada dos principais edificios universitarios desde o 25 de novembro ata o 14 de decembro. “Como sempre é un pracer poder colaborar neste tipo de iniciativas que tentan facer un pouquiño máis doada a vida da xente, polo que animamos a todas as persoas a participar deixando as súas doazóns”, salientou Esther de Blas, vicerreitora do Campus de Ourense, na presentación da campaña. [+info.](#)



A VIOLENCIA MACHISTA NAS INSTITUCIÓNS E NA NARRATIVA GALEGA, NAS DERRADEIRAS SESIÓNS DE BIBLIOLAB

DUVI 20/11/2019

Os faladoiros Bibliolab naceron da man da Unidade de Igualdade da Universidade como un punto de encontro para analizar e dar a coñecer os contidos dalgúns dos libros que abordan a temática da violencia machista. O ciclo arrancou en Vigo e tras pasar por Ourense e Pontevedra regresa agora na recta final a Vigo. Este xoves a partir das 18.00 horas, a Escola Universitaria de Estudos Empresariais acollerá o penúltimo faladoiro, titulado *Cómplices. A violencia machista institucional*, no que intervirán a socióloga experta en xénero Iria Villar, a profesora da Universidade de Vigo Carmen Verde e Monse Vilar, representando á Librería Lila. [+info.](#)



Juan Picos, José Rodrigo Dapena e Carlos Souto.

NOVE CONFERENCIAS PARA PÓR EN VALOR A CONSERVACIÓN DA BIODIVERSIDADE

DUVI PONTEVEDRA 21/11/2019

A contaminación luminosa, as mareas vermellas, a xestión do monte e a paisaxe ou a conservación de especies como o oso ou as pínegas serán algúns dos temas que este sábado 23 de novembro abordarán na Escola de Enxeñaría Forestal as III Xornadas Galegas de Patrimonio Natural e Biodiversidade. Promovidas pola Delegación de Pontevedra da Sociedade Galega de Historia Natural (SGHN) coa colaboración deste centro, estas xornadas reúnen no seu programa un total de nove conferencias. [+info.](#)



Un intre do relatorio celebrado na FCEE.

O CAMPUS ACOLLEU O INICIO DOS ACTOS DE FRIDAYS FOR FUTURE VIGO CONTRA O BLACK FRIDAY

DUVI 21/11/2019

Cun relatorio este xoves na aula 12-A da Facultade de Ciencias Económicas e Empresariais titulado *Consumismo desmesurado. Historia, consecuencias e solución* e coa proxección na sala II do edificio Miralles o pasado martes do documental *Made in, Made for. A realidade oculta da industria da moda*, o movemento Fridays for Future Vigo arrancou esta semana no campus de Vigo as accións que van desenvolver ata o vindeiro día 29 en contra do Black Friday. Pablo Guillén e Héctor Santorum foron os encargados de impartir hoxe un relatorio no que explicaron a historia do Black Friday, as consecuencias do consumismo desmesurado e que solucións pode adoptar a sociedade. [+info.](#)



Participantes na xuntanza.

A UNIVERSIDADE EXPLORA VÍAS DE COLABORACIÓN CON EXPERTOS E PROFESIONAIS DE GUATEMALA

Ao abeiro do programa de cooperación entre a Unión Europea e América Latina Eurosocal+, financiado pola Comisión Europea, o campus de Pontevedra recibiu a visita dun grupo de profesionais do ámbito xurídico e de académicos procedentes de Guatemala, cos que representantes da institución académica compartiron un encontro de traballo dirixido a explorar posibles vías de colaboración. [+info.](#)



Imaxe da concentración realizada na Facultade de Ciencias da Educación á que asistiu a directora da Unidade de Igualdade.

A UNIVERSIDADE RECEITA PÍLULAS DE IGUALDADE CONTRA AS VIOLENCIAS MACHISTAS

DUVI 25/11/2019

Neste 25 de novembro, Día Internacional contra as violencias machistas, a Universidade de Vigo receita algunhas “píulas de Igualdade” e faino a través de diferentes iniciativas: a principal, o lanzamento de varias pezas audiovisuais de pequeno tamaño dirixidas a prever este tipo de violencias e a sensibilizar ao alumnado sobre o uso inaxeitado das novas tecnoloxías; pero tamén o fixo a través da adhesión a diferentes manifestos pola eliminación da violencia contra a muller, dunha concentración diante da Facultade de Ciencias da Educación do campus de Ourense ou mesmo da apertura dunha exposición na Biblioteca Central [+info.](#)

10



Isabel Mociño coordina a publicación.

UN LIBRO PARA PÓR EN VALOR AS POTENCIALIDADES DO LIBRO-OBXECTO

DUVI OURENSE 25/11/2019

Unha monografía na que se recollen 14 estudos nos que se abordan, desde unha perspectiva de xénero, diferentes modalidades do libro-obxecto, as súas características e as súas potencialidades para a lectura, determinadas fundamentalmente pola materialidade. Así se presenta a publicación *Libro-obxecto e xénero: estudos ao redor do libro infantil como artefacto*, coordinado por Isabel Mociño, profesora da Facultade de Ciencias da Educación do campus de Ourense. [+info.](#)



As e os participantes na reunión final do proxecto en Polonia.

UN PROXECTO EUROPEO DOTA ÁS ONGS DE FERRAMENTAS CREATIVAS PARA MELLORAR A INTEGRACIÓN DE INMIGRANTES E REFUXIADOS

M^a DEL CAMEN ECHEVARRÍA DUVI 25/11/2019

A cidade polaca de Katowice acolleu a pasada fin de semana a xuntanza final do proxecto Erasmus + *Que pode facer o Design Thinking pola integración de inmigrantes e refuxiados?* (*What Design Thinking can do for the Integration of Migrants and Refugees?*). Tras un ano de traballo, a Universidade de Vigo, xunto a ONGs de Polonia e Lituania, coordinadas polas institucións Graceland e Eduplus, respectivamente, pecharon todas as compoñentes administrativas do proxecto, planificaron as actividades que se van levar a cabo nos países dos grupos participantes ata decembro e presentaron un libro de utilidade para as persoas que traballan con persoas inmigrantes e refuxiadas. [+info.](#)



Preto de 120 persoas participan no Pavillón Universitario neste evento solidario..

O MARATÓN SOLIDARIO DE ZUMBA REÚNE 250 QUILOS DE ALIMENTOS

DUVI PONTEVEDRA 29/11/2019

Preto de 120 persoas participaron na tarde deste xoves no Pavillón Universitario na décimo sétima edición do Maratón Solidario de Zumba, unha iniciativa promovida pola Área de Benestar, Saúde e Deporte da Universidade de Vigo xunto coa Vicerreitoría do campus que busca tanto promover a práctica de actividade física como contribuír ao labor social que desenvolve en Pontevedra o comedor social dos Pais Franciscanos. [+info.](#)



A través do proxecto Sherpa do Mar, liderado polo grupo REDE, Campus do Mar e OTRI.

GALICIA E PORTUGAL IMPULSARÁN A COMPETITIVIDADE E O EMPRENDIMENTO NO SECTOR MARIÑO E MARÍTIMO

DUVI 29/11/2019

A eurorexión volve converterse no escenario de traballo para un proxecto de investigación impulsado pola Universidade de Vigo e inserido na convocatoria Poctep 2019. Bautizado como Sherpa do Mar e liderado polo grupo REDE, Campus do Mar e a Oficina de I+D, o obxectivo é acompañar, titorizar e asesorar ás empresas do sector mariño e marítimo para mellorar a súa competitividade e ás persoas emprendedoras para consolidar as súas ideas de negocio en eidos como a pesca e a súa transformación, a industria naval ou o transporte de mercadorías ou persoas. [+info.](#)



Imaxe da recollida de datos con dron nunha das estradas elixidas.

O PROXECTO TOPACIO PROBA EN ESTRADAS DE CELANOVA E LOBIOS O SEU SISTEMA DE XESTIÓN DE VÍAS E BIOMASA PARA A PREVENCIÓN DE LUMES

ROSA TEDÍN DUVI OURENSE 28/11/2019

A estrada de Ourense a Celanova AG-31, nas proximidades desta última vila, e a OU-312, no Parque Natural da Serra do Xurés no seu paso por Lobios, están sendo o banco de probas do proxecto Topacio (*Tecnoloxías de optimización da xestión de infraestruturas para a prevención de incendios forestais*). Nelas estase a deseñar unha metodoloxía e unha ferramenta, baseada en tecnoloxías innovadoras, que teñen como obxectivo contribuír á prevención de lumes xestionando a información do estado das franxas de vexetación na contorna de vías de comunicación e poboacións. [+info.](#)



Un intre da recollida de sinaturas no Edificio de Ciencias Experimentais.

AMNISTÍA INTERNACIONAL DE VIGO RECOLLE SINATURAS NO CAMPUS POLOS DEREITOS HUMANOS

DUVI 28/11/2019

Dentro dos actos organizados para celebrar o vindeiro 10 de decembro o aniversario da Declaración Universal dos Dereitos Humanos, Amnistía Internacional de Vigo realizou este xoves unha recollida de sinaturas na entrada principal do Edificio de Ciencias Experimentais a favor da humanidade e contra o cambio climático. Nesta ocasión fixérono denunciando os abusos contra os dereitos humanos a través da exposición de tres casos protagonizados por tres defensoras e defensores de tres países distintos: Filipinas, Grecia e Irán. [+info.](#)

12



A actividade celebrouse no Edificio de Ferro.

UNHA FORMA DE VIOLENCIA DE XÉNERO CHAMADA TRATA CON FINS DE EXPLOTACIÓN SEXUA

ROSA TEDÍN DUVI OURENSE 27/11/2019

A trata con fins de explotación sexual como unha forma de violencia de xénero foi o tema central dunha xornada que este mércores acolleu o campus de Ourense e que estivo organizada pola Fundación Amaranta. Nela salientouse a importancia de abordar a visibilización desta realidade tendo en conta que “falar de trata é falar da historia de mulleres que o patriarcado pon a disposición dos homes de maneira pública. [+info.](#)



O acto estivo organizado polo grupo Ephylab.

A PROBLEMÁTICA DO LIXO NO MAR, DESDE UN PUNTO DE VISTA CIENTÍFICO

ROSA TEDÍN DUVI OURENSE 27/11/2019

Os datos que se manexan a nivel mundial falan dun volume anual de dez millóns de toneladas de lixo mariño que teñen un impacto directo e indirecto moi relevante na vida dos mares e océanos. Para falar desta problemática, a Facultade de Ciencias do campus de Ourense acolleu este mércores unha conferencia de Jesús Gago, científico do Instituto Español de Oceanografía en Vigo e doutor en Ciencias do Mar. [+info.](#)



O profesor de Ciencias da Educación e do Deporte Carlos Ayán é o coordinador desta rede.

A UNIVERSIDADE LIDERA UNHA REDE QUE DESENVOLVERÁ PROGRAMAS DE EXERCICIO PARA PERSOAS CON DISCAPACIDADE

DUVI PONTEVEDRA 26/11/2019

Desenvolver liñas de investigación conxuntas que teñan como punto de partida o deseño de programas de exercicio físico dirixidos a diferentes colectivos de persoas con discapacidade. Ese é o obxectivo central da Rede de Investigación en Persoas con Discapacidade: Exercicio, Actividade Física e Deporte Inclusivo (RIPD-EAFDI), que, baixo a coordinación do profesor da Facultade de Ciencias da Educación e do Deporte Carlos Ayán, reúne a investigadores e investigadoras das universidades de Vigo, León, País Vasco e Francisco de Vitoria de Madrid. [+info.](#)



A novena edición comprendeu 19 ponencias de especialistas nacionais e internacionais.

O CAFÉ CON SAL BAIXA O PANO DUN ANO REPLETO DE DIVULGACIÓN DA INVESTIGACIÓN MARIÑA

DUVI 26/11/2019

Tras dezanove relatorios sobre os retos actuais da investigación mariña, o ciclo Café con Sal baixou estes martes o pano da súa novena edición coa intervención de Iratxe Rubio, investigadora do Future Oceans Lab (CIM-UVigo) e do Centro Vasco para o Cambio Climático. Nestes últimos doce meses, pola Estación de Ciencias Mariñas de Toralla pasaron algúns dos especialistas máis relevantes en diferentes eidos da oceanografía xunto con investigadores e investigadoras emerxentes, tanto da Universidade de Vigo como doutros centros de I+D de España e doutros países como Chile, Reino Unido ou Italia. [+info.](#)

UNIVERSIDADE DE VIGO

Unidade de Análisis e Programas.

Edificio Filomena Dato.

Planta Baixa.

36310 Vigo (Pontevedra)

986.818.689 986.818.640